

## ORDENANZA FISCAL Nº 22

### REGULADORA DA TAXA POR OCUPACIÓN DE TERREOS DE USO PÚBLICO POR MESAS E CADEIRAS CON FINALIDADE LUCRATIVA.

#### Fundamento legal

##### Artigo 1º.

De conformidade co previsto no artigo 57 do R.D. Lexislativo 2/2004 de 5 de marzo polo que se aproba o Texto Refundido da Lei Reguladora das Facendas Locais, este Concello establece a *taxa pola ocupación de terreos de uso público por mesas e cadeiras con finalidade lucrativa*.

#### Feito impoñíbel

##### Artigo 2º.

Constitúe o feito impoñíbel da taxa a ocupación de terreos de uso público por mesas e cadeiras con finalidade lucrativa.

#### Suxeito pasivo

##### Artigo 3º.

Están obrigadas ao pagamento da taxa pola ocupación de terreos de uso público por mesas e cadeiras con finalidade lucrativa, as persoas físicas ou xurídicas e as entidades ás que se refire o artigo 35.4 da nova Lei Xeral Tributaria 58/03 de 17 de decembro, a favor das que se outorgou a licenza, ou aquelas que se beneficien da ocupación, cando se actúe sen a preceptiva autorización.

#### Responsábeis

##### Artigo 4º

1.- Responderán solidariamente das obrigas tributarias do suxeito pasivo as persoas físicas ou xurídicas a que se refire o artigo 42 da LXT.

2.- Responderán subsidiariamente das obrigas tributarias do suxeito pasivo as persoas físicas ou xurídicas a que se refire o artigo 43 da LXT.

#### Cota tributaria

##### Artigo 5º.

A cota tributaria consistirá na cantidade resultante de aplicar a tarifa recollida no seguinte cadro, de acordo cos conceptos e importes nel establecidos e atendendo á zonificación do viario municipal que se relaciona no Anexo da Ordenanza Fiscal Xeral municipal.

Localización da vía	Unidade de Débeda	Cota Trimestral (€)
Zonas 1, 2 e 3	Mesa	34,35
Zonas 4, 5 e 6	Mesa	21,30
Zonas 7 e 8	Mesa	17,15

#### Normas de xestión, administración e cobranza

## **Artigo 6º.**

1.- As cantidades esixíbeis de acordo coa tarifa, liquidaranse por cada ocupación solicitada ou realizada, por períodos bimensuais, sendo irredutíbeis por cada período autorizado.

2.- As persoas ou entidades interesadas na concesión das ocupacións reguladas nesta Ordenanza, terán de solicitar previamente a correspondente licenza, formulando declaración na que conste:

- a) O número de mesas incluídas na ocupación.
- b) Os demais elementos que se prevé instalar (cadeiras, zócalos, tarimas, parasoles, separadores, carpas, macetas...).
- c) Localización dentro do municipio, indicando o nome e tramo de vía afectado.

3.- No momento de presentación da solicitude efectuarase unha liquidación provisoria que terá, de conformidade co artigo 26.1 do R.D. Lexislativo 2/2004 de 5 de marzo, carácter de depósito previo, que se elevará a definitivo unha vez concedida a correspondente licenza ou autorización, previas as comprobacións que procederan por parte dos servizos municipais.

4.- Non se consentirá a ocupación da vía pública polos interesados en tanto non se obtivera a correspondente licenza.

5.- Ao cabo do bimestre natural polo que se autoriza a ocupación entenderase automaticamente renovada a concesión da licenza, por periodos mensuais. A licenza caducará por acordo expreso da Alcaldía ou cando se presente baixa xustificada polo interesado, ou polos seus lexítimos representantes no caso de finamento. Con independencia da causa que se alegue en contrario, a non presentación da baixa determinará a obriga de continuar aboando a taxa.

As autorizacións terán carácter persoal e non poderán ser cedidas ou arrendadas a terceiros. O incumprimento deste mandato dará lugar á anulación da licenza.

6.- O abono das taxas realizarase durante o período determinado polo Servizo de Recadación, agás que o reporte da taxa se producira con posterioridade a dita data, aboándose en tal caso a primeira cota rateada polos bimestres naturais que correspondan.

7.- O titular da licenza vén obrigado a deixar paso dabondo para o tránsito de peóns na zona obxecto da ocupación, que deberá ser como mínimo da metade do largo da sección da beirarrúa ou superficie ocupada, e nunca inferior a 1 m.

## **Obriga de pagamento**

### **Artigo 7º.**

1.- A obriga de pagamento nace :

a) Tratándose de concesións de novas ocupacións da vía pública: cando se inicie o uso, se ben no momento en que se presente a solicitude que inicie a actuación ou o expediente deberá realizarse o depósito previo total da liquidación.

b) Tratándose de concesións de aproveitamentos xa autorizados: cando a natureza material da taxa esixa o reporte periódico desta, o mesmo terá lugar o 1 de xaneiro de

cada ano e o período impositivo comprenderá o ano natural, salvo nos supostos de inicio ou cese na utilización privativa ou no aproveitamento especial, en cuxo caso o período impositivo se axustará a esa circunstancia co conseguinte rateo da cota. Cando por causas non imputábeis ao suxeito pasivo, o dereito á utilización ou aproveitamento do dominio público non se preste ou desenvolva, procederá a devolución do importe correspondente.

2.- O pagamento da taxa efectuarase:

a) Tratándose de concesións de novos aproveitamentos: por ingreso directo na entidade bancaria correspondente ou onde establecece o Concello, con anterioridade á entrega da correspondente licenza ou autorización.

b) Tratándose de concesións de aproveitamentos xa autorizados e prorrogados: unha vez incluídos nos padróns ou matrículas da taxa por períodos anuais, rateábeis en bimestres, nas oficinas de Recadación ou por domiciliación bancaria, no período de cobranza que se estableza ao efecto.

## **Beneficios fiscais**

### **Artigo 8º.**

Non se aplicarán bonificacións nin reducións para a determinación da débeda que non veñan establecidas nas leis ou tratados internacionais.

## **Infraccións e sancións**

### **Artigo 9º.**

En todo o relativo á cualificación de infraccións tributarias, así como as sancións que as mesmas correspondan en cada caso, estarase ao disposto nos artigos 178 e seguintes da Lei Xeral Tributaria 58/03 e a súa normativa de desenvolvemento.

## **Aprobación e vixencia**

### **Disposición final.**

1.- A presente Ordenanza entrará en vigor o día da súa publicación no Boletín Oficial da Provincia, e será de aplicación no exercicio de 2008, permanecendo en vigor ata que se acorde a súa modificación ou derogación.